

Երաժշտական խաղ «Ջաղացս մանի, մանի»

Երգի կատարումը կարելի է սկսել ջրաղացի մասին ասացվածքներ ասելով.

- ✓ Ես՝ աղա, դու՝ աղա, բա մեր աղունն ով աղա:
- ✓ Ջահելի խելք՝ անջուր ջրաղաց:
- ✓ Մուկն այրատանը խեղճ չի մնա:
- ✓ Ջաղացից ես եմ գալիս, դու ե՞ս այրոտել:
- ✓ Ամեն մարդ ջուրն իր ջաղացը կապի:
- ✓ Անջուր ջրաղացը այլուր չի աղա:
- ✓ Ջաղացը ջուրն է տարե, նա չախչախն է ման գալի:
- ✓ Ջաղացիդ միշտ հերթ լինի, մեջքդ ամուր բերդ լինի:
- ✓ և այլն:

Ապա շարունակել **«Ջրաղաց»** խաղով:

Երեխաներից մի քանիսը դառնում են ջրաղացի պտտվող անիվ, որին պտտում է ջուրը(նույն քանակով երեխաներ, որոնցից յուրաքանչյուրը բռնում է անիվ դարձած երեխաներից մեկի ձեռքից) և, թեթև, ռիթմիկ քայլերով պտտվելով, ռիթմիկ վանկարկում. «Փառ, գոռ, գուռ»: Երեխաներից մի քանիսը դառնում են ջրաղացի քար: Երբ անիվն սկսում է պտտվել, ջրաղացի քար դարձած երեխաները, ձեռքերն իրար ուսի վրա դրած, պտտվում են ու ռիթմիկ վանկարկում. «Չախկ, չոխկ, չուխկ»՝ միաժամանակ հարվածելով ոտքերով: Քիչ անց ջրերն ու անիվը դառնում են ցորեն և մոտենում ջրաղացքարին: Վերջինս տեղում կանգնելով և շարունակելով վանկարկումը, մի տեղ է բացում ցորենի համար: Ցորենը, վանկարկելով՝ «Թափ, թոփ, թուփ», մտնում է շրջանի մեջ: Ջրաղացքարը միանում և շարունակում է պտտվել: «Ցորեն» երեխաները ցուցադրում են ցորենի աղալը՝ անկանոն թռչկոտելով, զմփիկներով և այլն: Քիչ անց քարը նորից կանգնում է՝ չդադարեցնելով վանկարկումն ու քայլը: Այս անգամ, վանկարկելով՝ «Փառ, փոռ, փուռ», դուրս է «թափվում» այլուրը: Խաղի ընթացքում կարող են օգտագործվել համապատասխան հնչողությամբ հարվածայիններ կամ շրխկաններ:

Որից հետո կատարել երգը: Երգի կատարումն կարելի է սկսել ռիթմիկ արտասանությամբ.

- Չըխկ, չըխկ, չըխկ, չըխկ:

Միանում են նույն ռիթմով ծափերը: Ապա միանում են մի քանի շրխկաններ:

Երգի տողերը երգելիս՝ հարվածները դադարում են, իսկ կրկնվող տողը նորից ուղեկցվում է ռիթմին համապատասխան ծափերով (ցանկության դեպքում՝ նաև շրխկաններով):
Զրադացի անիվի շարժումը ցուցադրելու համար երկուսով կանգնում են դեմ դիմաց, ձեռքերը հագուցում իրար և շրջանաձև պտտում մեկ՝ դեպի իրեն, մեկ՝ դեպի դիմացինը:
Կարելի է նաև ձեռքերը հերթով պտտել՝ նախ աջը, հետո ձախը (մեկ՝ դեպի իրեն, մեկ՝ դեպի դիմացինը):

Երգը կարելի է կատարել.

- շրջանաձև պտտվելով՝ որպես ջրադացի քար,
- գույգերով,
- սկզբից՝ շրջանով, ապա շարունակել գույգերով:

Երգը ավարտվում է շրխկանների ռիթմիկ շրխկոցներով, որոնք հետզհետե մեղմանում են և մարում:

«Խնոցի, հարոցի» - 1

Խաղում են.

ա. Երկուսով, յուրաքանչյուրը աջ ձեռքով բռնում է իր դաստակից: Կանգնում են իրար դիմաց, յուրաքանչյուրը ձախ ձեռքով բռնում է դիմացինի աջ դաստակից: Նրանք դառնում են ճոճանակ: Մի փոքր երեխա նստում է նրանց ձեռքերին, իր ձեռքերով փաթաթվում նրանց վզին, իսկ նրանք տարուբերում են ու արտասանում կրկնակն ու առաջին տունը: Վերջին տողն ասելիս, իջեցնում են երեխային ու, ծափ տալով, ասում. «Տփեցի՛»: Տեքստը կարելի է շարունակել «բ» տարբերակով:

բ. Զույգերով, իրար դիմաց կանգնած, ձեռքերի մատներն իրար հագցրած, ոտքի մեկն առաջ, մյուսը՝ հետ: Ռիթմիկ շարժումով, նմանեցնելով խնոցու ետուառաջ գնալ - գալու շարժմանը, մի ոտքից մյուսը տեղափոխվելով, ձեռքերը ռիթմիկ, կտրուկ շարժումով առաջ ու ետ տանելով, ասում են.

կրկնակ.

Առաջինը – Խնոցի,

Երկրորդը – Հարեցի:

Միասին – Հոփփը, լըփփը (կրկնում են 6 անգամ)

Զըմփը, դըմփը (6անգամ)

Ծափը, ծըփը(6անգամ)

1. - Խնոցի,

- Հարեցի.

Թանը հանի՝ քամեցի,

Մրսուտ չորթան շինեցի,
Եղով ապուր եփեցի,
Պետոն ուզեց՝ տփեցի:

2. -Խնցի, խնցի,
Գցեցի ու բռնեցի,
Տարա - բերի՝ զարկեցի,
Հրեցի, չխչփեցի,
Հարեցի, հա, հարեցի,
Դեղին կարագ հանեցի:

3. - Խնցի,
- Հարեցի.
Լըփը, ըփը, լըրընգա,
Դե տար, դե բեր, տըրընգա.
Թև տու, թև առ,
Զըրընգա:

կրկնակ.-

Կրկնակը կարելի է կատարել՝ հերթով իրար փոխանցելով կրկնվող բառերը: Խաղի ավարտից անմիջապես հետո, երգում են «Հարի, հարի, խնցի» երգը:

«Հարի, հարի, խնցի»

Երգը կատարում են գույգերով, իրար դիմաց կանգնած, ձեռքերի մատներն իրար հագցրած, ոտքի մեկն առաջ, մյուսը՝ հետ: Ռիթմիկ շարժումով, նմանեցնելով խնցու ետուառաջ գնալ - գալու շարժմանը, մի ոտքից մյուսը տեղափոխվելով, ձեռքերը ռիթմիկ, կտրուկ շարժումով առաջ ու ետ տանելով: Երգը կարելի է ավարտել՝ ասելով.

-Խնցի, հարոցի, թանը՝ քեզ, կարագը՝ մեզ:

«Խնցի, հարոցի» - 2

Երկուսով կանգնում են մեջք – մեջքի, թևերն հագցնում իրար մեջ: Նրանցից մեկը թեքվում է առաջ՝ մյուսին շալակելով ու ոտքերը գետնից կտրելով: Նույնն էլ անում է մյուսը: Խաղում են ռիթմի մեջ՝ ասելով.

- Խնցին հա հարեմ,

Շալակեմ՝ սար հանեմ:

- Խնցին հա հարեմ,

Շալակեմ՝ գետն անցնեմ:

- Խնոցին հա հարեմ,

Շալակեմ՝ դաշտ տանեմ:

- Խնոցին հա հարեմ,

Կաթ ու մածուն կերցնեմ:

Կարելի է նույնն անել՝ ասելով.

-Խնոցի, հարոցի, թանը՝ քեզ, կարագը՝ մեզ:

«Խնոցի, հարոցի» - 3

Խաղում են զույգերով, իրար դիմաց կանգնած, ձեռքերի մատներն իրար հազցրած, ոտքի մեկն առաջ, մյուսը՝ հետ: Ռիթմիկ շարժումով, նմանեցնելով խնոցու ետուառաջ գնալ - գալու շարժմանը, մի ոտքից մյուսը տեղափոխվելով, ձեռքերը ռիթմիկ, կտրուկ շարժումով առաջ ու ետ տանելով, ասում են.

-Խնոցի, հարոցի, թանը՝ քեզ, կարագը՝ մեզ: